


72

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
DEC 17 1940

2.2

F 32.22/0.83.2

3222/0.83.2



福建續志卷五十

哈佛大學漢口圖書館珍藏印

孝義一

德行者教化之本周官條舉六行一曰孝而義之爲德介知仁中和之間士君子不獲遭時經緯達吾道於天下則修清井里無忝常倫經曰惟孝友於兄弟是亦爲政執一術而百善至孰有加於孝哉若夫家國安危之際友生急難之秋鼎鑊在前義不返顧慷慨奮激貫金石而不渝終踐其志猶古烈士之風也至於行能無所表見或後世民罔稱焉於是不惜千金之貲以

敦任卹之誼煦煦然好行其德以為一鄉一國之士匹夫慕義何處不勉哀而存之亦忠厚之道也遂繼前志傳孝義甄錄其尤以著於篇

五代

盧光閩縣人仕南唐為守將王審知建國光避地尤溪王氏亡李仁達據閩使陳臣弼攻尤溪光拒之于東廊水亭戰甚力邑人得以奔竄多光之力閩書

宋

鄭伯淵號秋浦羅源人急公好義為鄉塾師邑中青衿半出其門咸淳六年大旱伯淵年七十餘徒步

至福源潭為民祈禱翌日大雨如注明年旱亦如之邑有三溪歲久中溪壅塞伯淵捐金協眾復之居民感其德頌以詩著有梅村集閩書參正德府志

元

許知言閩清人兄逢言弟知白知什知億共五人母病越三月藥弗效知言乃齋戒籲天割股以進母病遂愈及母卒知言兄弟哀毀踰禮進士許叔度為立傳閩大記

明

李長孫字原善長樂人好義樂善鄉有貧不能葬者

出資營之嘗鑿田為溝以利灌溉鄉人德之名曰

福田溝萬歷府志

陳魯福清人性孝友承順父母父疾篤魯割股作粥以進籲天求代父病隨愈親終泣血廬墓景泰間鄉人舉其事於官里閭無少長皆稱之為孝老云

正德府志

莊思正號樂間叟閩縣諸生年十五割股以愈父疾父歿哀毀如不欲生生平以嚴肅治家以正道型俗有以惡告者視橐中之所有必贖其意以去精醫及堪輿術人之病者歿而擇地葬者多藉之而

不取其酬年八十餘手錄古人忠孝節義事蹟懸

於堂以教子孫成化間學使奏旌其閭并牌刊其

孝義懸府縣碑亭及其門以風俗云莊氏家傳

廖誠字伯純天順舉人授溫州訓導遷永嘉教諭時

教授李慶訓導楊儀卒於官親為殯殮且厚賻之

永嘉尉某嘗貸白金未償卒憫其孤貧焚券不計

改任禹城旋致仕平生篤於孝義治家甚嚴子雲

騰雲翔以雲騰貴累贈奉直大夫刑部員外郎正德

府志

張懋候官人成化舉人官河南藩寮年老還鄉正德

間江淮羣盜縱橫懋以俸市藥物數十篋載歸其
 子在途貨之贏數十金懋驚曰藥物有貴賤此人
 必誤矣舟行已二百餘里勅子持往還之居家周
 恤宗黨尤厚孫廷器世衡俱登科萬歷府志
 陳伯亮閩縣人生平不食言家積粟有糴者誤遺金
 而去伯亮急追之曰而更欲糴耶何為多與金其
 人感謝之嘉靖間倭掠郊野伯亮自鄉移入城市
 屋者多售數百金其故屋主訟之官官欲罪其人
 而令減直伯亮不可曰慎無為此向者吾避寇急
 於問舍既成價矣雖多得吾千金不悔也官甚重

之萬歷府志

葉廷萃字允升候官人嘉靖鄉薦積官南京工部郎

中廷萃和易坦直篤於倫行兄弟五人廷萃友愛

甚摯晚歲貧約處之泰然卒之日幾無以殮萬歷府志

林惠字仁澤閩縣人父歿廬墓三年凡祭必敬將祭

必齋兄弟六人同爨四十餘年雖妯娌亦無間言

以歲貢終增城教諭萬歷府志

許希賢字世昌閩縣人兩居親喪哀毀骨立既葬廬

墓二十八年虎不為暴子孫懇請乃還家以壽終

葬貴安山有司刻純孝字於墓門以表焉許氏家傳

黃讓長樂人嘉靖時父墓為山賊所發質其骨責贖讓罄產贖而葬之乃募壯士百餘人從督府討賊一子啓愚啓魯死之讓出奇計斬首二百餘人降者一千七百有奇賊既滅推其功于諸校竟不受

賞閩小記

莊脩字聞脩閩縣廩生自明思正至今莊氏紹書香者十一世綿聯不絕而脩為思正七世孫尤以文行著家居聚徒講學悉依白鹿洞規從遊者屢滿冠婚喪祭具脩古禮孝于親厚于宗族子以浚庠生家貧授徒講學以館穀為菽水晝館暮歸不離

親側孫立藝曾孫其綦俱閩諸生莊氏家傳

鄭時化字維雨福清人萬歷鄉薦性孝友父卒於燕奔數千里扶櫬還第賈于楚久無音耗復重繭入楚携與俱歸以廣文校士貴陽及令和平備盜救

荒績甚著卒於官舊通志

林滋字澹若輕財任狹凡詩賦書畫六壬遁甲之學罔不究心癸酉舉武闈甲申入都遇闖賊起上請纓疏時論壯之部議格不行未逾月明亡歸浮沉

詩酒研窮岐黃術以濟人府志

翁聯奮字士京福清人父娶妾朱氏生聯奮而弱四

孝義一

歲猶食乳時嫡母陳氏病篤醫謂唯人乳可治聯
 奮知自斷乳不食母服兩月而痊邑稱奇孝迨弱
 冠兩母繼亡哀毀柴立五代櫬未葬聯奮悉營宅
 兆併葬暴露支親十三柩艱難拮据尤為鄉里所
 稱縣志

龔懋墀守玉屏閩縣人由貢生除郴州同知歷亳州
 高唐再補湖廣都司經歷攝上津篆值李闖亂召
 父老守城捍賊羽書陳上官請發救兵兵未至而
 城陷死之贈奉政大夫按察使僉事蔡世遠傳

王思及字戴公長樂人崇正舉人知信宜縣擢御史
 明亡與妻李氏服毒死同邑李上林字大材陳颺
 言字孝嘉俱明亡殉難縣志

國朝

柯應鳳字伯羽長樂諸生有經濟才順治二年巨寇
 鄭某集眾海島聞其名迫為嚮道官應鳳數其罪
 狀賊怒割其舌不屈死妻鄭氏觸石而斃子廩生
 元標元標子順耳邑增生脩道掩骼亦力行善事
 以承先志柯氏家傳

葉良駒閩縣人性豁達力善行順治初疫氣盛行良
 駒施藥全活甚眾死不能殯者埋之歲饑傾廩以

濟子宗秉克承父志構書舍延師課族人子弟置

義田為膏火資又建宗祠增創祠業葉氏家傳

翁應宣字士宜閩縣人孝事繼母兼敬養兄嫂撫姪

如已出郡遭耿變勸之仕不從避地瑟江讓產睦

族孫國章曾孫大溱俱有聲庠序翁氏家傳

林從時閩縣人慷慨好義孝於事親康熙辛卯武舉

授把總於五縣寨響鼓山擒獲山寇薛彥文有功

又隨軍帥平臺灣南路緝獲餘孽杜君英又招撫

方力等社生番議叙軍功擢守備累遷至襄陽鎮

總兵官林氏家傳

林湛候官人篤於學手一經至老不輟以貢生設教

里閭教人絕浮名崇實學康熙甲寅耿藩開幕延

八閩才傑士或失身陷賊湛獨以疾辭杜門謝客

時於吟咏寓指斥之意性樸毅人不敢以非禮干

以子枝春貴贈中議大夫林氏家傳

林申甫字久徵長樂人年十五海寇劫其父申甫哀

號願以身代賊憐而釋之耿逆之變迫授偽職卻

不就匿身橘園洲母歿負土營葬考授經歷筮仕

未久乞養歸以奉父母脩祖宗祠墓置義渡築壺

塘鄉里受其惠縣志

陳天昌字昌粹連江人少好學端重如成人繼遭耿
 變從父避鳳岸日拾橡山中以給嘗讀書空樓竭
 精殫思常見怪於樓弗恐怖後游庠親老兄又病
 廢家赤貧天昌引為己責授徒得館穀以奉養親
 雍正癸卯長子衣德成進士除文安令迎天昌至
 署邑本瘠土患河決凋瘵未復天昌勗子行惠政
 大者如詳豁各倉民欠米及免協脩長屯夫入宮
 田一百三十餘頃皆天昌教也尋選順昌訓導口
 進諸生而程督之順士不舉於鄉久矣至是登賢
 書者六人文風丕振以老乞歸生平嗇于自奉而

樂周人之意戚屬饑待哺寒待衣者無不得其資
 以去事親孝事兄恭兄卒無子以所愛次子為後

卒年八十九

鄭方坤撰傳

高琬字騰士閩縣人善文兼習武備值海氛熾總督
 姚啓聖聞其才舉以贊軍事馳驅海上冒矢石以
 擣賊巢勦撫合宜歷五載寇平論功嘉獎晉一品
 頂帶曾孫藍珍乾隆庚辰副榜

高氏家乘

劉夢鯉字子叶閩清庠生邑溪口岸壤有奸人李國
 才投耿逆坐踞抽稅往來病之夢鯉與候官國學
 生王言等義氣激發挺身力除蠹弊竭貲築岸岸

成而舟人得以無擾衆立碑於南門以紀其事縣志
 莊金卿福清人仗義好施順治戊子海濱多警嘗救
 被虜者九人復贖被執者十三人歲大饑爲粥以
 待餓者脩潘渡路爲族兄婚娶給田以資族弟子

鄭璿字若文閩縣人父正誠司教南安海寇陷泉州

府志

鄭璿字若文閩縣人父正誠司教南安海寇陷泉州
 俘知縣教諭拘繫鷺門璿徒跣奔鷺門遇前同學
 翁氏子告以處伺道旁數日見其父父曰吾命懸
 指顧兒留增一累宜急歸璿悲傷饑餓卧翁家墳
 之父至曰俘官已議釋歸兒盍先渡海吾稍後趨

歸璿遂歸逾年而父不返突膏俘官悉解臺灣璿
 不告妻子復蹈海尋父至臺而父先遁歸時海寇
 緝捕甚急璿竄身窮島出沒蛟蜃之窟晦跡丐中
 每至急輒有神若天后者默相之後遇老舵工載
 之渡海船觸石破島嶼如鳧如葉舵工指微茫小
 路一痕曰從此可達泉州璿匍匐奔回而父已抵
 家三月矣兩涉漲海得父子生全而還咸謂純孝
 之報云高兆撰傳

張士捷字明凱福清人以歲貢選順昌訓導脩繕翼
 舍訓士先行誼鑑別精嚴嘗有寇警鄉民襁負入

城者半舍學宮煑糜以給數月賊平始去擢漳平教諭訓迪勸誘士尤樂附之秉鐸二十年及卒兩邑俱祀其主於學舍性孝友嘗讓萬金之產於異母弟著有薇巖集府志

張待問字子強候官人存心慈良事親以孝聞祖母劉目失明待問先意承志三十年起居飲食無不躬親母耄年怡然自得亡廢疾之苦以孫甄陶人

翰林贈文林郎

縣志

陳登字駿公連江貢生海寇陷城弟潤被虜父母憫之不置登入賊營傾囊贖弟以歸年十七卽代

任家事勤勞生計諸弟衣食婚娶皆力任之後食

指日繁諸弟以兄勞瘁謀析產登不得已從之歸

終取自置田遺諸弟曰田宅可買兄弟不可再得

也邑有東湖民田數萬畝藉以灌溉為流民攘據

日就壅塞登呈於縣令出貲濬復凡三廢三復邑

民賴其利他如葺宗祠置祀田脩學宮築橋路善

行甚多後聘脩連江縣志以精核稱子脩士字孝

齊邑歲貢生捨園為圳以利民田議毀西洋教堂

以建書院慷慨樂施著有詩文集七卷縣志

蕭良輔連江人六歲喪父哀毀如成人父嗜肉膾父

歿見贈輒悲泣家人因不敢進家貧母作苦日易數餅充腹而留其餘良輔知母餓已泣告必母食乃食嘗託言已食於親屬家忍饑養母母病竟日不食當九歲時母挈之乘舟帆索絆母落水良輔驚號沒水救之賴舟人救免臘月母病思食絲瓜良輔奔郊外號呼或告降虎嶺有瓜奔覓竟得之母食而愈其孝感如此

縣志

黃銓字簡齋古田諸生攻苦勤學早失怙事母盡孝其祖墳置祀田尤樂施與平糴以惠鄉隣延師以屬其後人稱長者孫世樞世樞兄弟甲科世樞授

兵部主事贈如其官著有學拙集

縣志

林和字玉伯侯官人少儻喜讀書又精騎射康熙間舉武鄉試第一會父歿絕意仕進折節脩長者行以敦本濟物爲己在建宗祠脩譜系資族屬之婚嫁喪葬者歲饑運米平糴以賑鄉人暇則督課子孫讀書砥行相繼成名晚築芳園飲酒賦詩其中子長源長瀚國學生長溼乾隆壬申舉人長瀚字其澄亦好施與有友子負官逋將鬻妻女立解橐以償友有以重貲寄貯者旣寄而友暴卒立召其子付之子愕然感謝去其義行多此類孫光鋒

乾隆己未進士府志

陳于侯字西侯侯官人康熙乙酉舉人聰穎善屬文

又好施與每歲除置大小函封數十遍給貧乏子

濤國學生授州倅能繼父志陳氏家傳

葛煥字子章候官人國學生授州同以父老辭去侍

膝下色養備至早年失恃而未葬中夜垂涕竭力

營窀穸撫羣從如已子延名師課讀先後成名又

樂獎後進之單寒者他如甃黃泥嶺石路償將樂

投水人官逋掩骼埋斃人多稱之子大梁康熙辛

卯舉人授新昌令多惠政次子連元舉於鄉三子

經邦字允莊孝友工時文與王九徵陳範倡和有

對山樓詩集由貢生授泰寧教諭未任而卒孫光

祖舉人碧山雜錄叅葛氏家傳

陳登瀛字海鶴福清人侍母極孝母年過六十出不

至暮盛寒窮夜聞呻吟趨侍既安而後退康熙中

挈其子九齡從福建巡撫張伯行抵吳門未三月

夢中作慟哭聲令九齡就學而身歸侍母平居教

子如嚴吏比九齡長稍不中繩墨輒事夏楚曰而

忘中丞正心誠意之教敢事名耶九齡令蜀每手

書諄諄訓之蔡文勤公世遠稱之曰慤實君子府志

劉兆基字開周閩縣人康熙戊子舉人雍正元年巡撫滿保以子廉方正薦至京以病乞歸尋授平和教諭未踰年因前任事解組歸里兆基天性純孝早失怙家貧授徒以養母先意承歡母卒哀毀盡禮竭瘞營葬事必誠必信延主共學書院講席多所造就其文原本經術羽翼先儒著有洒風亭集子元喈增生元鐘乾隆甲子舉人

劉氏家傳

王淇字咸允候官人康熙癸巳副榜七歲而孤母趙氏喪明淇侍疾罔懈舐目七晝夜而復明少受業於兄事兄如事父通周禮左氏性理諸書於濂洛

闕閩之學多所研究歲饑斗米千錢邑令餽米數

石辭不受家居教授學者遠近多從之著有四書

闡義

縣冊

劉聖振字虛舟閩縣人康熙丁酉舉人授廣西興業縣粵民不遵法紀聖振教督狼兵彈壓之民始知懼葺排柵錢馬蹄錢諸陋規邑人立碑志之居官寓寬於猛以仁愛爲心解組歸囊橐蕭然然性好施予每多周恤昆弟三人更相友愛居常以詩書課弟第鄰初成進士入翰林

縣冊

陳廷鎬字大英福州廩生積學工文事親先意承志

時得歡心侍母疾衣不解帶者數月父官京師廷
 鎬家居課督諸弟動必以禮次弟自幼喪明愛護
 尤篤有叔父狂躁不事生產廷鎬屢遭橫逆而勿
 怨生養死葬力任其事自立三考堂以自省考持
 身謹嚴焚父遺舊券救道上病人其義行多此類
 著有占象數未竟而卒

縣冊

李思哲字則達候官人篤行力學少喪父事母及祖
 母孝養無違每早起必具衣冠問安否母卒哀毀
 骨立祖母年七十餘染沉痾思哲夜藝香禱天俄
 而疾愈事諸兄若嚴父未冠文譽日起雍正癸卯

貢入成均尋以州判改元溪教諭飭躬率士一以

古人為法屏一切餽遺負笈者雲集捐貲脩學宮

明倫堂是科有登賢書者著有擷芳集四卷子玉

樹乾隆庚辰舉人

李氏家傳

翁基宇存履福清人弱歲能文慨然有當世之志欲

以功名自奮卒不售而家貧親老食指復繁乃間

關服賈以竭孝養最後治鹽筴擇人任時往往得

廉賈五利性好施凡中外族姓老弱孤寡之不能

衣食與死喪之弗克葬者必以告告則悉厭其所

欲以去事親敬以孝課諸弟俱成立

鄭方坤撰傳

王勅字聖仲閩縣人九徵子也勵志紹家學研究易
 理雍正巳酉舉人任安溪教諭以實學課士生平
 品端行粹篤於孝友子階升乾隆甲子舉人縣冊
 黃輔極字紫列閩縣人少穎異好讀書事親孝持身
 廉介以雍正癸丑進士授定襄縣興利剔弊民勒
 石以頌其德後改邵武教授捐脩學宮以立品敦
 行課士士風丕振親老乞歸居鄉敦睦好義年七
 十一卒

曹岱華字英卿候官人學佺曾孫幼失父哀慕過成
 人雍正乙卯舉於鄉補廣東知縣署小江場通商

恤竈百廢具舉授電白令多惠政卒於官岱華天
 性淳厚時露耿介而於孝友最篤曾祖學佺著述
 多散失岱華搜羅成帙授之梓而詩復行於世事
 母以孝聞游紹安撰傳

官莊字敬則候官人幼出為伯父後事嗣母惟謹本
 生父繼母就養於兄兄卒因迎養焉母歿戒二子
 喪葬盡禮勿以分產異視授建寧訓導署泰寧轉
 寧化訓迪甚篤著有拙齋集府志

李範字士疇福清人性伉爽敦厲風義繕學宮建奎
 光閣唐觀察使程巖墓在郡城北郊為豪民侵沒

範出貲贖回又為立祠立碑以表之歲饑命子為

官告糴自輸錢二百萬佐其費乾隆乙丑 詔免

天下正賦範因捐田租數千石族弟馥開府浙江

罷官留江東範間關往省再費數千金為治裝卒

迎之歸孝以事親及歿喪葬盡禮長子建極舉人

次建勳刑部四川員外郎府志

何敬祖字得充福清貢生奉母色養備至事諸昆甚

謹有以緩急告者輒應之子鵬程字砥崑乾隆辛

酉舉人事親亦以孝聞玉融文廟久傾敬祖欲脩

之疾亟囑鵬程曰吾志也勿以費繁而止及歿鵬

程絕水漿數日卒脩葺文廟以成父志府志

于蔚起字卓山古田庠生性孝友治家嚴整悉遵考

亭家訓子又顯授守備諄諄教以忠孝大節丁氏家傳

吳煒字燕侯福清人奉寡母無違每與人言母氏守

節荼苦輒悲哭不已兄子有惡疾家人皆匿避煒

朝夕撫視同里陳鵬中歲無子煒為買妾鵬死貧

不克葬煒疾篤囑其子為葬之其他義行多類此

府志

何長浩字得然福清人父遷會城之南臺長浩內行

淳備勇於為義郡學遭颶風將圯長浩獨力任之

又葺候官南平二縣學其他脩建南臺大橋及道路溝防分苗拯患事尤多臨卒囑其子員外郎際述建福州試院考棚際述成其志同郡王以標好施不倦自西安塘至洪山橋路壞亭圯以標捐貲甃砌行人便之府志

高鳳喈字文聲候官貢生孝於親庭幃無間言兄弟相繼夭諸姪俱幼妹適張亦寡鳳喈竭力以任之寒衣饑食悉撫慰之凡給棺施榘靡所不舉子世

倬有文名壬申副榜高氏家乘

何佩珠字嘉瑀閩縣拔貢生力學稽古事慈母先意

承志母歿哀毀骨立於諸弟篤友于之愛季弟皐

世撫其幼子教養兼盡及長又卒更顧復其遺孤

又念子姓蕃衍及仲兄食指之繁割田數百畝為

公業半以增祀父母半以為仲兄祀業生平尊師

重學給衣施榘竝周郡中節婦之貧者於戚族尤

厚恤之子恒潮丙辰舉人工詩文善繼父志黃任撰傳

陳發其字師顏候官拔貢生孝事父母有父執路某

葬於閩發其承父志歲時展墓弗懈撫弟姪友愛

倍孳生平通經史曾分纂省志著有四書講解詩

文集府志

林長楠字介飛候官人乾隆丙辰副榜會稽縣丞孝

親睦族篤於友愛與弟召華共切劘同榜中式且

精韻譜詩學著留經堂枕書四卷詞鵲六卷林氏家傳

林方苞字二實福清人敦孝友喜施與而長於醫恒

周人之意且以藥餌濟人至千金而不責償亦不

受券官濟南府通判陞惠州同知脩學校置義田

士民賴之方遊宦時以萬金托族人買遷其人蕩

盡及歸老稔知之而置不問平生好吟咏而不自

收拾其稿罕傳林氏家傳

魏開業閩縣人郡庠生父端餘教以義方開業性循

謹而勇於為義早喪母哀毀盡禮隨父客吳門先

意承志父欲賑貧周急皆力辦之娶繼母陸氏舉

五子開業撫諸弟怡怡友愛幼弟開德患痘幾殆

而父甚愛之開業恐傷父心虔禱於神願減已算

以益弟年已而果瘥體素羸父病用刻削劑日嘗

藥以進勞瘁而卒縣冊

林鶴鳴字仲榮福清人九歲失怙謹承慈教母得羸

疾晨夕奉湯藥既沒哀毀逾禮事祖母亦如之授

徒以供甘旨經營兩代窶窶分居時家物多推與

其弟而自留經書十餘種撫諸姪如子著有詩經

集解縣冊

謝人驥字大生候官舉人篤學工文幼偕諸兄温清定省父戒之曰勿以我故分爾心答曰讀書正以講明忠孝有親勿事奚讀書為少多疾恐不逮事一二老日仰天虔祝得偕諸昆奉親終天年死弗恨尋授清流教諭迎母至署未踰年母卒人驥哀毀脾疾屢發戒家人急為親營葬親自相地負土葬畢展拜慟哭曰吾事畢矣歸疾作而卒縣冊

謝清苓字謹脩長樂籍候官人篤於孝友讓財推產無所吝有叔乏嗣清苓敬事如父於人貧乏者資

給橫逆者禮化終無忤也嘗脩學宮創嵩山書院

濬長樂文洽浦皆以身先以子希遷贈奉直大夫

希安候補縣丞希賢灤州吏目縣志

葉宗岳字應五候官人侍母疾兩載衣不改帶昆弟

九人同居友愛無間言羣季筮仕而宗岳獨否曰

不以三公易吾親一日之養也貧乏者更樂周卹

之子夢雷孫光隆俱舉於鄉子夢蘭邑庠生夢熊

晉安上舍縣冊

王廷樑字維才號美溪閩縣人喪母廬墓三年墓離

家五十餘里每三日一歸省父父好施廷樑皆先

意而行父歿仍廬墓至久而歲時祭祀涕泣如初
篤於兄弟約歿必共葬預爲同穴之壙戒子姪勿
違也其他輕財好施多不勝舉縣志

郭蔚字鄰九候官人少補郡諸生篤於事親有孝行
舉優貢至京而卒於途邑人惜之府志

王朝屏字雲根閩縣人父應元雍正丙午舉人朝屏
幼警敏能屬文又承庭訓文譽日起乾隆甲子舉
於鄉爲人孝友純篤見義必爲衆曰王氏有子矣
仕至刑部員外郎著有述堂詩集縣志

興化府

唐

吳興莆田人屯田員外祭從弟時號長官神龍中以
家貲築延壽陂溉田萬餘頃復陞海爲田築長隄
障海水開溝大小六十餘條以導其流爲泄六十
餘所以殺其勢時有蛟爲孽隄數潰興欲除其害
遂攜刃入水斬蛟卒與蛟俱死鄉人建祠祀之宋
紹興十九年郡守陸渙奏封義勇侯今莆田稱水
利北洋曰吳長官南洋曰李長者云縣志

宋

鄭褒字成之莆田人希閔孫嘗應進士舉至輦下會

詔罷去遇王禹偁留褒褒曰褒有老母向欲干名以顯親耳今詔下將及閩吾母必計程以待遲一日即貽母一日憂禹偁惻其言賦詩贈之後登咸平進士判福州以便侍養書閩

李宏唐宗室裔候官籍家於莆田世雄於財宏性好施人稱長者初永春僊遊二縣水合於莆入海言水利者謂橫而堰之可灌田數萬畝治平間長樂錢氏女及進士林從世所築俱壞熙寧八年宏應詔來莆有僧智日者為相地於木蘭山下宏乃出錢七萬餘緡為之陂遂成乃開溝大小百餘條以

導陂之流作陡門以啓閉諸溝之水設涵泄以疏通陡門之所不及復築塘為田由是南洋田萬餘頃皆賴以灌溉民立廟於陂上春秋祀焉先時福州林從世至莆見同邑錢氏女築陂將軍巖弗就乃相溪下流於上杭溫泉水○築之捐貲十萬緡以給其役陂隨成而不勝潮勢衝激旋潰迨宏始克功成然實由錢氏從世開先也故錢氏從世與宏竝祀 國朝乾隆十六年宏之裔孫泌因年久水衝陂石欹斜獨力捐脩以承先志竝脩南北陂橋議叙主簿銜木蘭陂集

葉任字仲堪賓子廕授德化縣尉拂監司意投牒歸侍父終老不去左右遂無意仕進蔡襄嘗曰仲堪為吏必先繩其尤強猾者治民必先憐其尤貧弱者上官以勢奪其是如以礫食吾不從也居家廩有餘粟遇凶歲薄其直而出州黨賴之民有喪與疾時其緩急以濟其力游舊之好益困愈親若寒而就燠吾不去也故其生也人譽而亡也人哀其推重如此

縣志

汝器僂遊人性友愛以已分貲遜其兄湛妻朱氏賢文閣侍制紱女也有賢德積善憐貧有告糴者

如其數予之私藏其值於米中告之曰有糶幸再簸其人歸檢視得錢或袖還拒不受一夕飛錢滿

堂

縣志

明

張瀚字德源僂遊人寬厚禮士凡道路橋梁有傾圯者輒出貲助脩永樂初以有產秀民舉至京同儕皆得美官瀚獨托疾歸操尚清潔人稱為樂素先生子邦重綽有父風

縣志

陳淮字巨淵莆田人賢子幼有至性永樂間父官南康卒淮迎柩歸次於河滸夜宿柩旁岸多虎或使

避之淮曰吾父在此竟不去忽大雨河溢極且沒
撫膺呼號雨遂止置義塾訓鄉子弟姊為嫡母方
氏出有贅婿母與淮析居重違其情涕泣引咎遜
姊腹田而取其棄母乃悅子大同亦有孝行舊縣志
方炯字用晦莆田人襟懷高曠不屑屑於家人生產
精醫術值歲大疫設鼎於孔道來求療者先使其
徒診視相與審訂而後施治活人甚多人有酬以
貲者貧則却之富則受而散於鄉鄰之窮乏者著
有杏村肘後方傷寒書脈理精微閩書

陳一通名宣以字行莆田人性至孝早失恃祖母鞠

之後讀李密陳情疏輒涕下值祖父母諱日必緘
素號慟展謁祠墓備極孝思處弟姪間以百忍自
勵卒全恩好菴功有六七喪未舉者勉力葬之博
涉諸書喜吟咏所著詩數百首名自醫稿以孫經
邦贈吏部左侍郎縣志

林長清名清以字行莆田人正統乙丑進士歷行人
戶部員外郎天性廉儉未六十致仕母鄭氏八十
餘歲嬰疾輾轉床褥長清嘗視湯藥一夕數起扶
持之每歲母生日輒夙興代母梳洗背負出中堂
上壽行禮母閱其勞曰兒休矣對曰使長清歲得

以為常豈非大願耶及母歿哀毀過人士大夫見其老而篤孝咸嘆為不可及

縣志

林軻字叔孟莆田人性樂易好施予嘗督脩木蘭陂萬金陡門為北洋分水咽喉先是南北洋戒無踰限軻密告太守王弼為闢而寬之功一夕就今蘭水紆迴繞城郭至豐美橋與使華合流滙一郡之靈秀且以貽北洋萬世利軻有力焉歲儉散穀捐金郡人賴以全活

縣志

鄭恒叔僊遊人高邁樂施力所能為無有不周正統九年例僉輸糧於京師見鄉人逋負縲縶至眾遂

以徵完報使得釋約期來納及期間有至者率空手恒淑悉代為賂子紀進士以檢討歸養時故人以御史按郡或緣事以千金求解恒淑不可麾使亟去後贈南京戶部右侍郎

縣志

盧仲生字怕蘭僊遊人正德丁丑八月與魏昇討賊陳四殲之察院沈某詳請給冠帶任巡捕事後出貲築東門城一百五十丈先是賊黨哨聚仲生出家財招勇士三百餘以保地方及賊逼城知縣林汝常嘗召其眾以助防禦論者義之

縣志

王鏐鎰莆田人宏治辛酉鄉薦授南昌教諭侍郎鄭

岳為方伯時數不便於宸濠因忌之撫他狀誣岳以鑠鎰岳同學友也繫鑠鎰指鄭有橐金寄之拷掠幾死卒不肯玷岳節乃與岳歸宸濠誅岳復起力薦鑠鎰不報鑠鎰與林貞肅俊世同巷俊以岳事亦甚重之

閩書

陳履素字俊明僊遊諸生性朴持大體嘗與脩南湖助建安利橋鄭紀高其行與知縣萬璉書謂為陳履素之敦龐張德源之好施林孟光之野朴鄭德安之古澹後生小子猶能誇頌而向慕之年八十

四卒

舊縣志

鄭主忠號三峰僊遊人紀季子以父蔭補壽州知州孝友性成紀致仕回主忠即乞歸養及紀卒盡禮盡哀兄主敬任浙江司主事卒於官姪箕尚在襁褓主忠教育如已出僉都御史陳志以孝友疏聞

縣志

周鳴鸞字士和莆田人性至孝正德己卯鄉薦母病封股和粥以進疾果愈母卒廬墓三載甘露降授桂陽州判丁外艱廬墓如喪母時憲使嚴泰督學田汝成為脩前坊題曰孝子官至武寧令歸家極

清苦

縣志

林賢莆田人永齡孫性至孝事親必具甘脆親歿手刻像奉之廬墓六年朝夕泣血歲饑賑貧掩骼行誼甚高郡旌其門曰孝順縣志

方正梁字兆之莆田人嘉靖辛卯鄉薦領鈞州學正轉南京國子學正擢趙府長史卒正梁早孤念母茹苦益盡孝道嘗授經里中歸問母起居日一再至偶有佳果輒歸遺母母卒哀毀逾常治墳墓躬掬土爲之宦趙時趙王雅喜詞賦正梁每應教咸存託諷王稍稍悟王有寵姬徐氏喪悼念不已諸詩人爭希王指爲作挽歌王曰昔盧詢祖嘗挽趙

郡王妃先生何不同諸客賦耶正梁正色曰詢祖詞甚佳能令王心惋切臣詩卽作不能使王涕也王俛首嘆善爲正梁疏請加秩四品居頃之忽感微疾逝子元浩有孝行具詩才先卒仲子元淇聲律尺牘楷書有唐晉人風致縣志

蕭龜字洪鼎僊遊人正德間父以事充南策衛軍時母林氏孕龜僅三月及龜生十五歲每與母言及父事輒淚下父殞衛所龜聞訃慟哭仆地例當補伍刺血書本叩閭會赦龜卽奔赴衛尋父骸歸葬

縣志

黃奕休僊遊人性至孝父病取肝以療鄉黨稱為異

孝縣志

林寶僊遊人父早喪力田養母母病剖肝以進創久不能愈後偶於野田中拾得異桃服之乃愈寶弟

福妻陳氏亦剔臂療姑知縣李扶竝旌之及寶卒

鄉人以其孝行足風祠祀折桂里東山之陽縣志

李大紹字宗烈幼時父天爵歿痛不及養刻木以奉

朔望瞻拜如事生焉鄉人咸擬之丁蘭事寡母陳

氏歷八十餘載竭力承顏有如一曰性好善凡橋

梁道路多為脩整閩書

程光遠字日照莆田人幼涉經史事親孝飲饌必躬

致精致潔嘗刲股愈父病父歿廬墓兄病又刲股

愈之兄晚得奇疾光遠日夜扶掖無倦色縣志

李文字日章僊遊人母黃氏病文祝天刺肘和糜其

長子洪毓醫母如其父推官殷宗器扁曰孝行重

光四子瑀亦以孝聞瑀病長子開英妻傅氏刲股

愈之瑀妻卓氏病開英亦祝天刲股一門孝行為

世罕觀舊縣志

陳聖玉號碧峯僊遊人事親以孝聞時父病聖玉焚

香祝天一日甘露降於庭父吸而愈咸頌其孝縣志

國朝

張自蘭字芳遠僊遊諸生崇正末寇亂賊陳尾擄其
兄自蘭年甫十八歲詣賊營願以身代賊義之因
得脫郭爾隆寇興泰里按寨索餉自蘭破產以護

族黨縣志

陳高春僊遊人性孝母吳氏方娠七月父諸生仲純
遊學金陵卒於旅邸高春年十五尋父骸歸葬順
治初海氛方熾負母逃難母歿刻像事之每詣墓
號慟喜為善事縣志

宋十三莆田人當海氛未靖隨父避難遇賊將刃其

父固持賊手號泣求代為賊所害父獲免後五日

家人收其屍面如生眼猶流血年未冠而捐軀全

父其至性有過人者族人祔於祖祠稱為篤孝縣志

朱光鼎字薇南莆田人家貧其父居厘光鼎賜冠廩

郡庠文名日起旦暮代父肩而往還久弗倦市井

傳為美談父歿喪盡哀每祭必縞素哭泣歲以為

常教人視其材多所造就張中丞伯行選入鼇峰

聘至江蘇皆與同邑鄭文炳俱年五十八卒同稱

孝子云縣志

陳日進字邦祚僊遊人好學明理為士林所重尤精

易理耿藩叛率鄉人築天齊寨以爲固部署徵發
皆按紀律凡寇之遲速戰之勝負以卜決之無不
奇中鄉人避亂者多依之弟邦棟疎財重義喜急
人之患族鄰恃其言以爲信縣志

翁炳文字與弼莆田人與人交敦尚古處閩變後棄
舉子業以濟人爲事嘗過東門河見瀕河枯骸相
錯持一甕往收隨拾隨多積至數十甕買山掩瘞
其好義多此類子帝城舉人孫霈霖辛巳進士縣志
林煌字建仲莆田增生海寇至父衍端被執哀懇釋
父代死寇俱釋之母患眼疾奉侍不離待諸弟雍

睦無間著竹園集四卷祠忠義縣志

宋慶曾字沂公莆田人有夙慧經書過目成誦年十

四就布政使于成龍試援筆立就延入署讀書補
弟子員益鍵戶淬礪家庭相師友有環山詩草性
至孝父楸復病侍湯藥衣不解帶旣歿哀毀異常
喪葬如禮康熙癸巳由明經秉寧洋鐸道險不得
奉母往留室侍養獨挈長子英行抵署見學宮傾
頽卽捐俸脩葺又設規條以勗士生平在家孝友
接物和平士林重之英字兼邦邑貢生八歲能文
受業於同邑鄭文炳父有疾昕夕侍湯藥及歿毀

幾滅性躬奉櫬歸徒跣號哭行道爲之感泣時兩弟俱幼祖母垂白英獨力措拄事祖母生盡養死盡禮又孝事母及生母出告反面事必稟而後行構祠祀治窀穸攝家政分毫不入私橐與諸弟怡怡友善孫帝賚乾隆庚午舉人

縣志

魏和僊遊人父卧病母不得於其父因爲所棄和苦諫不從事父愈謹家貧或周以穀不受或助金爲婚娶曰母何在敢及此耶自力以養三十年不避寒暑偶以事出必囑諸鄰周視歸則風雨不失鄰亦代爲之炊有徵租者至和適輪膳遲久乃至其

人俄詈之和笑受或曰此孝子也待父食畢乃來耳其人嘆服不忍食而去

縣志

劉鴻字磐侯莆田人少失怙事母孝與妻翁氏竭力奉菽水并推先志以養叔父鄉里之貧者周之邑遭耿亂鴻力脩祖祠砌行路重濬笏石通溝及涵江水心塘暇則與邑中耆老結社賦詩孫祖堯邑庠生善承先志文行可爲模楷著有學敬齋言行錄曾孫雄萬乾隆己卯舉人閩縣教諭

縣志

徐萬寶字祖寧僊遊人出蔡世遠之門蔡深器之年十四時母李病剗胸肉以進父南高年好施萬寶

承志而行雍正乙巳丙午歲洊饑萬寶竭藏以濟米粥兼賑日不下萬人分籌按給不令混淆男竒日女偶日無譁者一日給兩日食寒士以禮送至家族戚倍餽之前後共捐賑八千餘石全活甚眾竟以溽暑積勞卒議叙 恩贈奉直大夫縣志

黃瑞本僊遊人年十歲山寇肆掠奉孀母陳氏避難遭寇欲殺其母瑞本爭刃請代寇竒之不數武又遇寇勢益暴母引頸受誅瑞本哀號泣抱天色倏暗寇對天驚謝願保送至家縣志

程大僖字而有莆田人鯤化子幼失恃事繼母如所

生善承父志隨父任部郎考授州同授撫寧令邑當山海要衝甫下車悉心吏治設易知單草陋規雜派聽斷明決人不敢欺垂橐去官家居力行善事析已產為學田設義田助族人冠婚喪葬建義塾課族中子弟他如置義塚砌石路施藥及構又為守令委築鎮前隄濬小西湖木蘭陂萬金陡門諸河雖捐貲不惜也同邑康熙甲午舉人戴程甸字學佩知廣東仁化縣愛民禮士脩先賢周濂溪祠及致仕歸治窰窰葺祠宇創脩龍坡祖社族戚鄉隣有不足者量力周助一鄉德之縣志

鄭偉字蒼伊僊遊諸生戶部正學孫衢州教授承禎
子承禎患疽偉衣不解帶歷十晝夜父憐之詭云
已愈令就寢偉仍立門外父意其已寢畧呻吟而
偉已至父歿哀毀終喪忌辰前三日卽齋戒掛像
於堂哭之生平不苟取歲饑有乘夜暗投以米偉
見之輒取置門外閉其門以寢年七十五日忽
具衣冠辭親友曰某日某時將永訣矣應期而逝

縣志

張振華字子京莆田人先世遭明季亂有仇者率賊
索餉不得戕其族振華痛之求其後脩族系建祠

祀并營葬族之無後者乾隆九年歲饑捐貲以濟
鄉人德之年七十七卒著存畊堂詩鈔子琛庠生

省心堂集

程學泗字立曾莆田人甫孩提便知獻羹大父前年
十二隸郡博士籍旋食餼事親色養處昆季無間
言嘗赴省試居停主婦少而寡頗致殷勤翼日托
故他徙一貧士將鬻室學泗勉狗其請旣而轉售
他氏價浮數十金袖以予之或怪而問故曰此固
某之業也忍求利乎凡親朋就試無資輒出金佐
之無纖微德色其敦尚氣誼如此

縣志

宋濂字爾凝莆田人父萬葉在途病卒濂甫八歲與
兄璵佺澧孝事祖母既長砥礪廉隅篤學授徒視
名利得喪泊如也飽穀有餘輒施諸窮餓者子聖
時十二歲而濂歿聖時事寡母以孝論文積學寒
暑無間至嘔血成疾生平質厚然諾不欺施予不
吝年四十六卒孫若霖辛未進士保山知縣縣志
鄭士仁字立公莆田人文炳子文炳行萬餘里至海
尋父世稱孝子士仁稟庭訓工爲文章尋入太學
時張清恪公伯行巡撫江蘇延文炳爲書院掌教
士仁隨父聞緒論學篤而行益脩伯行曰有是父

必有是子後文炳爲洞橋山長議脩文廟又因大
旱爲民禱雨得應太守贈以金數辭不獲因以脩
嶺路之險壞者士仁皆承指畫克襄其成而尤切
於報本迨遠脩先墓葺遠代宗祠置租充祭親歿
廬墓側與弟帝眷友愛甚篤病而藥歿而葬撫遺
孤以至成立益孝友其天性也他如出粟平值施
樽置塚善行不可枚舉以歲貢授司訓年六十二
卒著有藹香居詩集子清芳遠芳廉芳皆績學能
文承遺令修平海衛學書院克世其家隱拙齋文
鈔參縣冊
車應藩字扶潛莆田人服賈以養母母邁竒病醫不

能治應藩割股進不効援刀取肝和糜奉母病果
 霍然又有黃安母病燃臂祝天腕無完肉疾劇復
 割肝以療又馮露市販養父母弟妹母疾篤割股
 弗効割肝刀鈍以槌奮擊入骨數寸仆地死縣志
 方正和字叶士莆田人幼隨父於建安喪母號慟幾
 絕比長事父備極孝養兄遺二孤正和母事寡嫂
 子視諸姪嘗率子廣贈布司經歷脩廟學葺朱子
 祠捐義倉穀襄造寧海橋脩堤砌路以利行人季
 子名欽貢生有學行事親先意承志購置祭產以
 其餘賑饑乏者自父歿奔歸新祠墓建義塾聚族

人絃誦其中著有萃馨亭集縣治有旌善坊名欽

與馬縣志

林翼卿僊遊人事寡母盡孝以利濟為心敦行不怠
 邑有金馬橋圯於水往來病涉翼卿捨舟為渡復
 捐貲建橋又大圳村之大濟橋積雨衝圯其孫雲
 倡義興脩以承先志林氏家傳
 徐光字士直弟上字士德俱僊遊庠生兄弟友愛孝

親睦族力行善事造邑之青龍石馬周澤白馬平
 政湯泉晏宮等石橋又脩明倫堂勸構書院置塚
 施樸光授雲南彌勒州知州 誥封奉直大夫上

候選同知以子貴 誥贈奉政大夫光子大成歲
貢生大源中書科中書上子大瑞州同大猷國學
生大巖候補同知俱克繼父志造莆邑龍鬚菡蘆
石橋又脩雙坑白馬青龍石橋及砌築孔道鄉人
義之縣冊

福建續志卷五十一終

福建續志卷五十一

孝義二

泉州府

宋

曾孝純字君施晉江人父公亮卒詔遺蔭外增推恩
二人孝純爲殿中丞賜同進士出身力辭以所得
官予族人之未仕者二十四年不改秩紹聖中擢
太常丞執政沮之遂杜門不仕治家有法子弟非
冠帶不見晝日不得居內闔門雍肅家無私財故
其子孫獨貧縣志

黃章取肝採母劉祥取肝採父並見真文忠公德秀
勸孝文又有趙希琳取肝以療母疾俱晉江人

府志

明

張頌惠安人恤孤賑貧作家塾延名儒教子孫親戚
子弟來學者悉廩之歲大疫鄉人或闔門病頌持
粉漿藥物沿戶省視正統中沙寇作亂扼要堅守
令抽大戶轉米餉軍人洶洶謀避頌率先詣縣受
米尹卽委之督餉頌勒什伍止宿輸納悉有次第
無一亂行者

府志

李訓掃安溪人森從兄也正統中森賑饑乏錙謀於

訓掃營若干篋以從無吝色性至孝父宗源以上
世軍罪歿於南都訓掃年十三獨往數千里負父
櫬舟遇風幾覆呼天哭泣忽風息波靜如有默相
之者訓掃所爲皆因心則友似易而難鄉閭共稱

道之

府志

郭濱字本淵晉江人幼有至性兄弟七人濱最少父
母兄弟皆鍾愛之父歿諸昆遵遺命欲以家產盡
遺之濱固辭均分父伯叔兄子逋解金數百濱悉
輸私業代償於是家徒四壁精岐黃術恒捐貲市
藥以應人求惠邑令背發癰延濱治之偕友往旣

痊致謝與友分之令駭異濱曰吾婁友也義不敢私嘗曰醫活人術也試術以幸其能藏術以顯其功挾術以邀其利皆非活人者也性仗義友人告窘則傾囊應之鄉人有構難者懇喻勸解必求其釋乃已於是姻戚皆感嘆年六十一卒

林昌安溪人骯髒有機智所居地患寇寇至則舉族逃竄山谷中昌出貲築樓十仞倉困井臼爨餽床凳之屬皆具分居男女外樓具穿窬孔可以開弓發銃炮外溝三丈許嘉靖中白葉坂寇至不得攻倭寇猖獗人皆來樓中避寇倭聲言攻樓昌課僮

耕作若無事者獨令人買弓矢火藥募戰手寇至攻樓連二日昌率衆禦之斃賊四十餘而樓中人中寇矢者一人而已久之斃其酋寇各閉營不出旋引去

府志

陳建沆晉江人父歿母改適與其祖母居及五六歲問祖母曰人皆有母何我獨無祖母語故輒掩涕不食稍長習攻金跡母所在時時持錢奉母母所適死無以爲生卽迎歸與祖母並養家人事母稍不至卽忿恚自撾晚歲母疾親滌溺器櫛笄總視飲食搔痛癢設榻母旁以待呼名如是者三年每

食必祝曰天佑吾母時有家犬乳猫鷄互翼雛之
異又喜賙濟戚族有司旌其門郡邑稱為孝順先
生子延表安慶訓導縣志

張守化字時化晉江人少孤事母至孝家酷貧年十
七出授書以供母母歿哀禮如度嘉靖申值倭寇
兄陷賊索贖金乃檢橐中束脩及妻裝携以往賊
少之守化悽愴哀慟賊為感動縱之去出授弟子
海上寺以其束脩販米市中時推其餘以哺饑者
人謂舌耕之遺幾何可復繼乎守化曰烏念繼後
惟當前不能已吾心而推之耳後兄病問醫古雷

山天大雨渡水幾沒得巨木亂流而濟蓋孝友之

報云子為刑部郎贈如其官

何鏡山文集

王應篤南安人嘉靖季邑中寇將發其祖塚應篤募
死士與寇為出入發大火竈歸寇物色之已空塚
嘆惜去復捐貲脩祖祠傾囊贖兄弟之陷寇者少
喪母而哀事繼母無怠猶子產痘醫謂黑不可幾
吮之或治應篤即為吮焉族有窮不能婚喪者助
以舉歿時子衿列狀有司表曰孝行何鏡山集

楊守愷南安人奉母承歡兄弟至老不忍折箸妯娌
襁子互乳無間時稱楊孝子嘗築亭青山嶺至今

傳之

閩書

顧應蘭字維心晉江諸生戶部侍郎珀仲孫也珀居鄉每值凶災捐穀出賑而應蘭能承其志嘉靖庚申辛酉間民患倭大死疫應蘭召役夫舉藁裡竹簞哀屍一萬六千餘而髀斷髑髏且以萬具別男女而邱之

縣志

傳新養字汝成南安人嘉靖三十九年倭寇發新養捐貲募兵破賊時山賊驚遁復從仙遊犯永春永春典史侯爵蓬壺義士尤濂約兵合攻之新養中伏矢及妻王氏姪君和皆被執去新養仰天大呼

遂自刎時同邑黃元謙因倭與邑中無良相煽盜元謙從弟赤髮兒從之元謙大義滅親赤髮兒投之水歿而殞殮之盜遂執元謙露刃劫之元謙瞋目曰寧死肯從賊乎賊亦投元謙水中死

府志

蔡希旦同安人爲人謹嚴刻苦讀書野寺一婦夜款門希旦曰可速去恐僧見辱婦固求宿希旦大恚閉門不納倭寇至所居平林闔謀禦之推希旦爲首悉括丁壯得二百餘人晝夜巡警數日賊大至希旦挺身出衆從之已而賊三道繞其後衆奔潰賊遂剽刃希旦死焉後以子守愚貴贈四川按察

使縣志

陳文七福清人梓匠於泉家有祖父一日謂儕輩曰
日吾心悸豈吾祖有恙乎馳歸福清祖果疾草焚
香籲天願割肝以療援刀割腹竟不知肝處恍有
神人搥其背俄肝出煮粥以進祖果瘳自此皮膚
突起一疤人稱爲疤孝孫祖終爲泉人携販呂宋
呂宋聞其孝厚賚之家遂以富

王肇禎同安人與父伯騰網魚牛鼻溪伯騰溺深處
肇禎援之胥溺焉會同儕者亟拯肇禎曰未出吾
父也復投淵求之與父偕殞

康朔字用復惠安人朗弟勵志好學督學田汝成試
其形勢策竒之曰此子足跡殆遍天下嘗自銘座
右曰中庸吾弗措之訓可以爲學曾子曰三省之
旨可以立身孟子三自反之論可以居鄉嘉靖癸
卯領鄉舉布衣藿食絕意仕進以例遙授都察院
都事致仕朔居喪不入內遇祖父母父母諱辰齋
素三日哭泣哀慕婚冠一衣一冠必依家禮屢延
鄉賓不就年七十七卒病篤時聞家婦沒曰豈可
以不任廢服加衣冠身首乃絕子士廸鄉貢爲無
錫丞合浦有士行

閩書叅
惠安志

陳輝字季昭惠安人參政睿之孫知州煒知府煌之弟而輝為知縣世傳三牧為人孝友醇謹有萬石風早喪母哀毀如禮事繼母如所生聰敏博學嘉靖初年薦於國學會當謁銓而繼母歿時輝已嗣叔父後猶心喪三年服除授翁源知縣未及任而

卒府志

吳良丞南安人中年哭母喪明辛酉寇亂火及親舍良丞號慟衛母柩不肯去既而反風滅火母櫬獲全人以為孝感云縣志

莊鳳章字誠夫晉江人用賓子明中葉倭亂發其先

塚鳳章叔用晦抵賊營奪骸鬪死鳳章突陣負體并叔尸以歸後入國子監伏闕上父叔功得贈蔭客死武清武清令曾曰唯為之殯殮今配祀用賓

崇賢祠府志

黃深晉江人嘉靖季賊發人塚深直往欲啓父墳出櫬正值賊至塚次欲發塚顧饑頓走掠食未遑也深伏身灌莽中入夜取櫬出會天驟雷雨賊解散得其渡溪棄船載櫬以歸府志

詹仰憲原名仰成以字行安溪人仰庇弟敏智算善擘畫輕財而恥自封郡邑大夫有興作之事輒俾

仰憲主之仰憲於木植輓瓦漆髹塗墁踊賤窳良心計日審不失尺寸公帑或不時給仰憲先以家貲為損減時時持平於親友間賑饑濟貧惟力是視繕郡城脩洛陽橋作嶽神祠塔至其少孤事兄仰庇若嚴父歲饑殍死相望有司開倉發帑請仰憲屏當必往城市村落隨處散給益以已貲煮粥賑饑者或分以錢人多賴以全活

景璧集叅安溪志

陳安字叔勉晉江人父曾涪州州判善徑尺書安萬歷歲貢授靖江訓導累遷台州教授以國子典籍乞歸其事親至孝事兄如父執喪水漿不入口斷

葷酒者三年友人趙生陷倭難被質捐貲贖之趙生力營償金辭弗受四為師儒官肅範章軌標表諸生而於台州陶鑄尤多台人肖像祠之又祀名宦子鳴華見選舉志

舊志叅閩書

傅晚遲字廷勉南安人五歲父陣亡母王氏被獲百計求死賊知為新養妻壯其義而歸之晚遲孤母寡艱苦萬狀母嘗病則密割股調羹以進病愈問故晚遲疑妻邱氏漏故終身不與言時邱氏已生男志節五歲矣亦能順孝

府志

黃俞叔同安諸生能詩父商於粵十九年不歸俞叔

尋至化州得之父已病瞽徒步負父歸竭蹶終養
族人文焰爲著興山孝子傳舊志參同安志

蕪聚庶安溪人崇正強寇廖君應君禮焚劫村舍聚
庶督率鄉兵戢靖後陳爾峰潘惜復煽亂更糾衆
擒之未幾強賊張六角起焚掠湖頭盤踞感德里
勢甚銳聚庶復會鄉勇分道夾攻戰於康槌山躬
冒矢石生擒賊魁王開尋鄭元等復寇又同屯兵
擒之屢次裹糧從征不費官鏹歷縛渠魁不損一
兵當道多其義勇予把總劄付旌其門府志

張璇光號義山同安廩生崇正末時事日非每劇飲

大醉慷慨悲歌繼以痛哭甲申之變絕粒數日不
死持巾櫛歎曰太祖頒諸生巾自冠臨朝三日取
前庶人後三公之義諸生獨不可以義自効乎自
櫛髮投井中水淺乃俛首就水死張氏家傳

國朝

潘見龍字正南晉江人幼孤事母有至性弱冠補諸
生順治戊子長兄某歿於安邑見龍歸其喪會海
氛寇郡城中戒嚴民出入皆有印記見龍間道歸
計母老嫂寡諸孤幼圍城中必不可活乃負母先
出趨閩湖次及寡嫂諸孤最後始挈其妻又入賊

壘勦哭旬日脫其從兄歸陳恭尹爲叙其行誼稱
爲篤行君子

縣志

梁濟字平甫南安人宋丞相克家之後順治初奉母
避寇挈弟妹諸甥十餘口均衣推食極力保護有
黃十一與其族孝廉有隙欲得而手刃之憤族人
閉土堡匿護積薪四門將盡燔以洩忿濟經其鄉
爲開譬講解活人千計又嘗救束縛者十餘人室
女被掠者十餘人有喪母携金市棺者爲土豪櫻
去濟自豪帥追給之子國寶康熙庚辰進士鎮平

和縣

府志

李日燦字葆甫號漁仲安溪人先春子相國光地世
父也順治甲午貢於鄉時鼎革初山海煽亂一家
十二人悉被擄先春以憂殞日燦遠出奔歸旣痛
父又悲弟姪之在羈也哀麻詣賊壘聲淚甚哀引
義慷慨渠魁亦感動然終邀賂日燦自賊還料家
僮輩百人涕泗與謀衆皆願出死力夜冒大霧捫
藤以登度天已曉卽鳴螺直逼賊帳賊出不意又
霧重不辨衆寡狼狽奔竄墮崖死者無算出弟姪
二人餘又繫入他壘魁旣走脫遂大徵合遠近賊
將萬餘人晝夜攻奪故壘日燦率衆拒之小大百

餘戰賊散亡畧盡勢蹙歸命於官其家長幼悉出而數縣積寇皆平入肄國子選通判不就而歸善古文辭綜所著名曰傭言終年八十八後光地入

覲奏其事

聖祖賜在原至誼額以旌其家

李氏家傳

洪寶基字伯珍南安人為諸生慷慨有大節時海氛山寇竊發族推寶基督鄉兵備盜一鄉賴焉嘗從數人巡徼至石坑猝遇巨魁廖丑丑為賊前鋒驍勇冠其屬同行數人皆引避寶基挺身迎之竟擒丑丑梟其首而歸由此名震邑里提軍嘉勞之後

白頭賊攻安溪寶基復與族叔啓範率鄉兵由閭道解安溪之圍會鄭氏索餉至英山族攻殺之鄭大怒且勦洪氏適族中有與鄭交者哀解稍釋遣校來探洪氏紛紛欲逃寶基曰此時州郡皆鄭據逃且安之乃領鼓吹前迓十里外誠族人曰若等登砦望吾信息吉凶以決進退吉則皆前凶則各任所之校見寶基大喜下馬揖曰固知公等無他吾豈以數人累舉族洪氏由是獲全

府志

洪啓範字爾錫南安人少讀書沉靜有智慮當山海騷擾族以啓範為砦長時泉標朱中軍威望素著

與洪氏深相結山寇陳申李復貴會攻洪砦中軍
提兵擒二酋鄉人以安嗣白頭賊圍安溪拒援兵
於巖嶺嶺峻溪惡相持累月安溪幾不支啓範曰
從吾鄉間道由英格出賊不意可救安溪往見朱
中軍言狀中軍憐之乃曰平時握手若兄弟軍中
則無戲言啓範曰願當軍法遂導官軍攀陟而上
以鄉兵爲前鋒是日重霧瀰山谷兵抵嶺上據勝
地賊乃覺一戰而潰塹枕坑谷不可勝數乘勝抵
安邑制閩上其功下詔褒嘉清溪人至今嘖嘖焉

府志

陳曙字樹初晉江人事親以孝聞十三歲父母患疫
禱天願以身代比長值母病劇親嘗湯藥滌廁踰
母眼昏以舌舐得復明順治丁亥戊子間充鄉導
引大兵撫泉與旗弁查將軍爲異姓兄弟及鄭氏
平查將軍爲大帥駐兵東門外遣騎持令箭護其
家有婦女百餘爲兵縛纒見箭乃駭散各還家得
免俘辱騎詢曙已故二子避入永春其長孫及一
僕方被繫南去尋至演武場得之引見查將軍予
金贈衣又遺以佩劍弓矢使庇家親至曙座前奠
酒未幾有他駐兵踞其宅索酒食不給適白頭賊

夜襲郡敗走駐兵得賊號衣密擲其家床下誣與
賊通曙長孫持弓矢衣服自明寧海將軍驗實釋
之乾隆六年以孝 旌表建坊乾隆十六年以孫

大玠貴馳贈中書舍人

劉存菴撰傳參
近道齋文集

蕭從我安溪人追賊林良於崇信之割竹宮時七社
鄉兵未集從我獨以其鄉四十餘人陷陣戰賊數
千斬百餘級舉其旌自是凡有師旅之事高山社
遂以黑旗稱焉從我每戰輒爭先間足為荆棘所
絆被刃死鄉間哀之

府志

李光益字利卿安溪人當海寇圍泉中丞吳興祚將

由永救泉被賊踞白鷓嶺峻險難越李光地令光
益領鄉壯接引光益潛師乘黑夜直逼寇壘斬關
奪隘賊驚竄大破之黎明詰幕獻馘吳中丞嘉其
義曰此神勇也薦授守備

府志

王生晉江人康熙甲寅海寇亂失寡母唐生遂棄家
賣卜誓不得母不歸後十年宿潮州旅舍夢神人
指母處明日得母於陳氏家白主人負之而還居
數年生舟行覆溺聞空中人呼孝子在遂得一板

附之以活

府志

蘇國珍晉江人為貴州敷勇衛諸生以父功授錦衣

衛正千戶癸未父兄殉安慶之難蓬跣千里昇櫬歸念兄國瓓清宦割腴遺之所居鄰邇巨寇鄉人數擾國珍出資築土堡禦之遠近五百餘口受其庇又濬大陂渠溉洋田千餘頃至今人誦之編集先正格言著樵寄垂後錄年八十一卒府志

李光垵字阜卿安溪諸生康熙間耿逆平後鄭經猶據厦島流賊蔡寅突至盤嶺兄光地比里伍丁壯以為聲援光垵自請往禦遂直抵嶺下適值雲霧四起咫尺不辨賊據嶺巔臨谷下望蒲野蔬畦木棧皆為我衆遽驚退是歲偽將劉國軒圍泉斷漳

興橋諸軍皆不得進光垵領鄉壯由永春兼行路與賊遇三戰皆捷奪白鴿嶺迎巡撫之師復為先導拔永春長驅而下泉圍遂解時偽鎮尚有在德邑南庭者光垵遂逼賊壘賊望風夜遁餘黨悉平叙勲授府通判辭不就李氏家傳

黃士珍字邦祉惠安人父懷佳值寇亂嘗以貲贖掠民士珍少孤露父母葬海邊值海氛令下棄邊地越者無赦士珍潛以瓦棺拾親骸歸遇邏卒執之泣告且示得免貧不能再葬時哭於棺旁同邑孫氏捨地葬焉士珍生平好學著有讀史一得錄府志

陳聲滔字希敬惠安人幼有至性值甲寅之亂父設
教於竹嶺會賊至聲滔聞警疾趨視館舍已灰燼
號泣踉蹌遍履積屍於亂草中求得其父扶之歸
道復遇賊憐而釋之性好施凡有興舉創築獨力
經營邑令錢名世延赴賓筵年六十八卒府志
李光斗字樞卿安溪人通判日燥子太學生性至孝
時時爲嬰兒慕以娛父母父母別字之曰萊菴爲
人慷慨尚義綽有父風方日燥之急難也光斗隨
父行間寢戈沫血不離側康熙戊午妖人蔡寅剽
劫郡縣光斗遣僕黃鵬領家僮數十人佐邑令李

鈺擊敗之是歲海寇圍泉州悉寧海將軍統大軍
救援入杉關駐師漳界寇斷江東橋師不得達光
斗率鄉旅間道過漳平石柱嶺鑿山支橋迎導王
師由湖頭鄉出安溪進援圍遂解時兵役薦興追
呼孔急光斗爲邑人代輸不取其償府志

王錫百字文人晉江人命岳長子性孝友母病嘗糞
母歿居喪盡哀盡禮事繼母尤謹父歿盡以產讓
二弟康熙間拔貢歷建寧府教授政績著聞府志

王家獎同安人五世同居一門六十餘口男女各治
其事操中饋五日一輪一味之微必長幼分嘗遷

界時四野流離而王氏保聚如初所飼蜂房既分復聚鄉人傳其事邑令給扁旌之縣志

鄧熾字夏明安溪諸生幼從其父孕傑受六經博綜三禮尤篤孝友有弟居德化每歲時必相就把袂言歡累月乃歸課子孫有法府志

王贊槐同安人世有隱德父覲為寧海州判五世同居贊槐善繼其志內外愈無間言紳士為作王氏

五世同居詩以美之府志

林崧字肇笏晉江人父為桓為仇家所害崧年十七宿露餐風闢道偵之閱八十餘日懸主惡之首剖

胸出肺肝獻父靈前復求手刃父者卒遇諸山間

撞其胸仆之不數日死遂陷囹圄久之海氛熾得

脫歸率眾捍衛鄉里奪還惠邑男女被掠者故紳

李夢祥子孫衰替櫬暴道傍訪其族人資之營葬

子延狎舉人府志

鄭台源晉江人父病割股和藥嘗得遺金五十餘兩

訪主還之值寇亂以家貲贖難民二十五人府志

方惟正同安人伯兄早逝撫孤姪如已出傾家財為

次兄惟中營生惟中客死復往負其骸歸其子復

天婦守志待之加篤云府志

陳萬寶字時初安溪人遷鶴子登康熙壬午賢書次
 弟歿撫兩孤姪如子丁丑丙戌泉郡大饑煮粥於
 承天開元二寺以食貧者泉人義之安溪令許封
 男卒於官萬寶捐貲遣家人護柩歸江右子覺世
 字莘志雍正甲辰舉人事父祖甚得歡心母晚病
 瘋坐起須人覺世朝夕寢帷調護累歲居喪泣至
 嘔血庚寅歲大歉計租所入給升斗多寡有差穀
 貴常減價平糶鄉人稱德府志
 王忠輔安溪貢生幼有至性十歲時家貧嘗晨起索
 米於十里外歸作飯父適之田母恐忠輔饑欲先

食之不忍飲以薄糜又不忍持飯餉父食畢歸然
 後敢食又屢入深林中採藥賣之以供父母比長
 經營四方凡父母之養生送死無不周至他如葺
 宮牆治道路調里黨賑困窮具多義舉府志
 林鼎漢晉江人少從父服賈歸舟父歿倉猝莫辨又
 恐舟人及同舟者惡之與父屍寢處晨昏進食如
 常抵岸始痛哭殯殮盡禮母因海氛赴水死鼎漢
 尋遺骸不得終身不衣帛食肉縣志

莊琛字堯甫惠安監生居家孝友嘗浮海至姑蘇遭
 颶風舟幾覆籲天乞生還事母俄而風息撫二兒

遺孤若已出歲饑出粟以濟鄉人橋梁道路多所
 脩築孫世英兵部郎中世芳舉人以世英貴累贈
 中憲大夫乾隆癸未年 旌表孝子建坊入祠子
 維禱字天相監生亦有孝行居喪哀毀會隣火弗
 戒將及親柩維禱抱柩號泣火忽止又脩惠寧德
 懋二橋以子世英貴贈中憲大夫

府志

漳州府

宋

黃槩字平叔龍溪人好學力行事親至孝嘗語人曰
 學為忠孝而已不爾雖讀書與不識字同父有疾

傾貲求醫或謂槩家貧獨不為子孫計乎槩泣曰
 苟吾父可愈雖饑餓何傷父將卒曰為人子若爾
 者可無憾矣以子彥臣貴封承議郎賜緋累贈朝
 散郎子孫登科不絕人以為孝行之報

府志

陳諤字昌國龍溪人有至性少遊太學累試不效歸
 以其學教授里人以孝弟忠信為本兄弟友愛不
 分居崇寧初郡舉八行諤為首授岳州文學

縣志

陳湜龍溪人政和間嘗有牙媪遺珠於其門莫記其
 所媪過其門四顧若有所物色湜呼問之媪曰嘗
 遺珠為主逼取雖市屋鬻女度不能償湜曰第言

其狀媪以實告湜全歸之媪驚喜拜謝而去里人有喪遺其白金器皿湜拾得之屢問掌事者器皿有遺否掌事急求未得湜即歸之鄉人咏嘆不已湜嘗夢人告之曰汝壽終七十二後至八十四蓋陰德之報也

縣志

明

林賁漳浦人知府表之次子篤行好義嘗捐田租一百二十石充學以贍貧士歲荒煮粥以飼饑者莆士阮琳為流賊所執將害賁遺金賊壘琳得釋歸督學邵銳榜其事於學宮祀鄉賢

府志

陳約字守甫海澄人性友愛好義嘗走闕下訟其弟冤獄二十四將之亂率族人依險樹柵眾賴以安既而議設縣治衙署迫隘約捐祖居充之又倡

廣泮池祀鄉賢

府志

林維聰南靖人幼聰敏六歲而孤母守志教養長領成化鄉薦任南昌推官有廉能聲以不得朝夕迎養思慕輒泣下屢欲辭官比見寧藩有逆志即解組歸吏部課其寃行取浩然不就人稱其慕親之

孝見幾之哲

閩書叅縣志

林逸龍溪人篤行好學早喪父獨奉母以居兄贅居

桐城逸欲請其兄嫂同居以養母妻楊氏不聽對
案不食楊氏感化順從及兄嫂歸逸事之甚謹不
私蓄一錢鄉人皆取則焉縣志

盧元漳浦人父卒家貧弗克葬因鬻其子既授以值
而未携去一日元採薪山中得金二錠以充塋原
值悉還子得完聚府志

許尚端沈胄詔安人俱以善事母著尚端母卒盧墓
而胄能置產以分其弟顧性皆好義沙寇之亂舉
城紛紛尚端乃散其家財募衆捍禦而胄奮勇突
圍請兵於潮卒使涂膺成全城之功者二人有力

焉縣志

蕭舉龍溪人給事中璿之子性純孝事三母如一嫡
母陳氏病癰舉吮之愈庶母阮氏楚撻舉承顏跪
受阮終感悟慈愛如已出遇風雨至父墳哀號西
隣失火將及父坊舉仰天號訴火遂滅郡守張鵬
以其事聞縣志

蔡彖海澄人敦尚孝友長幼五十餘口同居共爨一
錢尺帛不入私室至於娣姒亦相和睦子五人廼
達邇迥選俱恪守家法至孫曾四世雍睦之風流
於遠邇府志

紀孚兆字道範海澄人善事父母甘旨寒温竭力營
 辦授徒遠村朔望必歸省母有不豫色率妻蔣氏
 跪問必得其意父遺田宅悉以讓其弟居父喪廬
 墓三年不入卧内一時若蔡烈林一陽皆傾心下
 之著有心得極圖說妻蔣氏亦善事其姑

縣志

吳震龍溪人

今海澄

為邑弟子天性孝友篤志好古築

小室曰顏巷聚書讀之立祠堂以祀先祭必恪恭
 著有射禮輯說道原錄年八十一卒蔡烈題其墓

曰古學君子

縣志參 癸酉志

潘桂芳字佳值龍溪人應貢廷試第一任錢塘泰寧

兩學博以勸學成德為已任擢國子典簿歷梧州
 別駕司厰悉以羨餘三千輸歸公帑致仕歸桂芳
 天性孝友幼失怙事大母鄭及母謝悉得歡心館
 穀所入為弟妹畢婚嫁無所吝

府志

侯任字志尹龍溪人博古能詩家貧授徒養親而婚
 其弟葬其期功五六喪其子不能婚不恤也嘉靖
 已未倭入寇被執素聞其名不忍加害嘗與潘鳴
 時施仁往來講學著有論學大旨讀左偶見霞山

雜錄

縣志參 癸酉志

陳茂馨南靖人事父及繼母以孝祖母林氏年九十

餘茂馨親爲櫛沐一夜三炊衣不解帶嘉靖辛酉
寇陷邑城茂馨侍之勇忍去賊至妻許氏及二女
俱死焉督學宋儀望爲著一門三節傳萬歷辛巳
以貢授淮安訓導歲饑請於漕撫給粥賑濟又請
於隄使賑諸貧生淮人士甚德之府志
黎時中字慎甫漳州衛人萬歷舉人才名籍甚父弗
治產家益落時中拮据俯仰爲弟妹婚嫁七人凡
饋問所入悉推奉養均諸弟不私一鏗久之窘甚
乃謁選壽昌令多善政而性狷介果於任事補潮
州奉委省獄雪無辜死刑三十餘人遷感恩令卒

府志

鄭榮字邦信龍溪人父業農命往田間每懷書以誦
稍長入郡庠以孝聞其弟卞性急書忍字以警之
操履端方言行必飭居峻林學者稱峻林先生姪
正學字道獻亦不妄取與爲文奇警著有家禮辨

文山十不如前論

縣志參
突酉志

余喬烈詔安人賃傭養親親百餘歲齒脫所不能食
者已不忍食親病衣不解帶親不能浴雖盛暑不
浴也親死哀毀瘠立廬墓三年哀如初喪薦紳咸
推重之府志

陳仕祿諂安人事嫡母以孝稱其父苦風疾醫云蚘
蛇可愈求之弗得仕祿乃入山索蛇月餘得之調
藥以進果愈與兄分產兄數年蕩盡仕祿復分所
得予之兄沒姪負債復捐田俾鬻以償隣里之喪
而貧者咸恤焉傳有餓婦竊其園之荳仕祿望見
而避之使拾以去府志

國朝

陳謙海澄人海澄公黃梧婿也少補諸生性豪邁梧
最愛之城將困傾貲佐軍將數百人守東門伺賊
方晏開門擊之城陷被執時同殉難者長泰戴鏘

好走馬擊劍嘗結納勇士甲寅之變白芳度行收
兵得死士數百人故其部曲最強城陷亦被執張
濟者梧姪婿也幼讀書爲平和巨族海寇將至以
勸之遁曰事迫矣燕巢於幕逃之入家山庶可免
乎濟曰受黃氏恩多矣臨難不可去乃將兵擊賊
城陷被執黃芳名梧胞姪也亦諸生性恬淡無驕
氣乙卯芳度使掌北門亦被執黃翼黃香梧族也
翼性孝同梧納土歸誠調同安陞水師右路總兵
因誤失職芳度令守西門被執九子暨全家殉難
香掌火攻屢破賊城陷亦被執蔡隆海澄人以軍

功陞副將守南門朱武泉人為隨標遊擊吳友平
 和人因亂募兵同芳度守禦賊薄城為炮擊死隆
 與武俱被執陳驥平和人原任水師左營遊擊驍
 勇善戰守西門城陷被執俱不屈死事聞朝廷各
 贈廕有差府志

按閩州經耿鄭之亂一時義勇激發執干戈
 衛社稷慷慨就死而不顧者指不勝屈

聖朝立祠褒祀殉難大臣閩人黃芳度陳丹赤輩
 既功作元祀矣今

天子即位特命詞臣重緝死節臣僚立牌以祀於京

師之昭忠祠八閩死難者自黃相而下計四

十六人如黃相賴陞張松齡戴璣羅文舉鄭

宗煥戴麟陳謙張濟朱王造鄒儀周施大晁

葉有挺孔念厚謝邦協劉渭龍李鎮國何履

鉢鍾和宇毛錦生志乘具載事蹟彰彰外若

副將胡希孔包太興守備林炫張玉彭捷知

州魏人鏡通判許文耀知縣陳培亨教諭余

光辰縣丞俞之琛吏目鄭亮諸生劉元昇朱

光球千總陳元曾珍把總閩榮范得時歐春

吳麟張天成蔡以藩吳兆熾鄭光宏劉祥葉

龍將弁張國柱皆節秉丹忱名列功載而搜其行事郡志或缺焉今依翰林院功臣館移文所載以備稽考云

葉心一名逢春以字行海澄人隱德實行孚於里黨當海寇時獨心一所居相戒無擾五鄉倚為安宅偽海兵起虜人激餉稍拂意輒殺人心一多方營救全活無數嘗有二十四人漁於大小担之間為賊所困詰知為心一鄉人遣二人挈舟還留二十二人為質曰延心一至則免汝不則若輩懸吾手矣二人告急心一憮然曰賊即欲得我而甘心亦

當以一身為二十二人往徑赴賊舟其酋盛服倚舷而迎曰受恩久不醉欲藉此來會耳因厚出金

帛心一概不受惟以二十四人還縣志

柯求長泰人其兄為劇賊林掠鴿所殺及掠鴿就撫求荷鋤伏道左出其不意從背後搥殺之斷其頭

獻於有司當事方以撫賊為計竟坐求擅殺棄市君子謂葉任為孝子柯求為悌弟府志

孫淵光字陸陶詔安庠生為人忠厚寬和外翁乏嗣有子為螟蛉別居家計托淵光外翁歿淵光名其子悉還之甲辰間民遷移內地歲凶艱食有健卒

掠買婦女數十驅以北行淵光聞哭聲度武人不
可勸以義乃募諸亡命告曰若素所行皆非正能
解此厄乃丈夫耳皆曰諾鷄初鳴伏近郊聞卒過
挺擊之卒鼠竄亡命乃謂諸婦女曰吾非賊承孫
君意救爾耳乃各歸其家府志

陳明節字省軒龍溪人性孝友爲諸弟婚娶時濟其
乏後被誣入獄子志超奔訴於戎帥寃得白父子
嘗挾貲避寇猝與賊遇賊欲刃明節志超號泣請
代賊義釋之明節歿志超與諸弟友愛善承父志

縣志

黃金鐘龍溪人由郡諸生授杭州府同知權南推事
除陋規禁私索商舶便之攝僊居邑篆奸民以例
金進峻拒之以病告歸金鐘未仕時喜爲德於鄉
子天瑞雍正癸丑進士官刑部主事亦能舉其職

縣志

黃淑孕字碩壺父爲海寇所執索贖金淑孕年十四
號泣請代賊憐而釋之子文煥文揚皆以孝聞縣志

沈攀桂諂安諸生慷慨尚義乾隆七年奸徒陳作謀
亂邑帥聚兵守城城中人驚散攀桂倡義糾合鄉
勇伏擊之擒賊奪軍械無算民賴安堵後議叙將

授以官會攀桂病歸乃寢

沈氏家傳

余士前字庸然漳州人父賈西洋娶婦生三子先是婦浴於溪觸海氣孕鱷魚置諸海及父卒士前携三弟歸登舟鱷魚隨焉舟犯萬里長沙觸之碎士前兄弟與同舟十七人得不死匍匐海島渴甚號天得雨截竹貯之束壞木爲槎排洶浪望救槎數翻鱷悉負以出凡十八日遇商船風駛壓槎沉久復出衆爭緣以上大舟士前先扶擁三弟過船已獨後而槎解衆撒長繩使挽之再墜乃得升鱷亦逝士前於絕島驚濤中出萬死護三弱弟卒與俱

濟人咸謂友於之報

縣志

許長灝字遠谿龍溪人幼失怙恃育於祖母祖母病

瀕血告天以股肉進弗效灝不勝哀亦卒

縣志

阮道泰字志同漳浦人幼舉止異常兒父家居不暖席道泰獨與兄奉母遇譴怒必長跪竟日事悉聽命於兄有問以私植者不應嘗曰兄弟合食而私異財物畛域若行路遮蔽若穿窬吾耻之父卒號痛幾絕素篤於學至是益自刻勵工文章風雨壞屋廬父母柩未葬道泰恐危於風雨哀號竟日遂得病病革欲起拜母母止之泣且言曰不孝不能

長侍母側死乞青布衫一襲為歛勿用緇帛重兒罪也遂卒

縣志

延平府

宋

祝染沙縣人好施予遇歉歲為粥以食貧者後生一子性聰慧攻舉子業赴舉大魁天下

縣志

明

任琬順昌人生六月失怙母吳氏矢節撫之琬性孝母疾以香附臂熱之哀號顙天疾竟愈母壽九十而卒殯葬惟禮廬墓三年哀毀如初叅議曾鸞

題其堂曰永思

府志

黃中字大本南平人以貢入南雍授武康縣丞視篆疏河廣儲均役民咸利之性孝父疽發背侍湯藥匝月衣不解帶葬伯鉞賙從叔濟歸族叔瀚之櫬於珠崖不私其產以子焯貴封禮部主事年八十

屢與大賓

閩書叅縣志

蕭文秀字廷實順昌人父章應貢將北上秀跪曰大人年踰八十奈何以頽齡履修途不可請隨行又不可甫抵杭果以疾報文秀即徒步往遇父櫬於江郎山痛哭瀕絕葬祭力行古禮不作浮屠事奉

毋娛順母卒寢息柩旁厝葬祇求棲神勿計後福未幾流寇猝至未葬者荼毒備慘人以文秀為誠

孝先見云府志

陳嘉謨字應良順昌人十歲失怙哭奠如成人禮奉

瞽母黃氏一如其意食息皆親持抱弗令出他人

手母年九十卒哀毀骨立行人為之感愴力求善

地以葬積雪凝寒廬墓自若邁疾而歿府志

官天緯沙縣庠生事母黃氏篤孝母年八十一卒哀

慟幾絕水漿不入口者累日既葬廬墓三年縣志

彭繼美將樂人父病劇求醫不效或勸割股繼美云

恐股非藥且無毀傷理或曰豈直在股君子積誠

堅冰且泮冬植且萌繼美悟如其言以進父病果

愈巡按湯兆京旌其門府志

王吉清永安人忠懿王審知裔幼負才名試輒冠軍

以艱再阻遂却仕進與其子京寶相繼樂善遇貧

而逋負者悉賑以焚其券郡邑賓焉府志

蕭日煦將樂人以律學為應山尉擢檄督築藩城時

隣州盜起刻期決戰日煦率兵先往擊其不備賊

驚散去盜復惟埋數十人監司委日煦籍捕盜操

百金祈免日煦輒斥去竟坐之法盜憾捐金為間

免官歸府志

揭中行將樂人邑水災山川崩改縣令察行誠確凡

建置悉委經營俱克報命曾捐山助建禁山堂止

射利人鑿山壞蔭邑人識之弟中獻陷非罪鬻已

田以贖聞者稱義府志

廖叢梓將樂人少貧餒弟兄五人叢梓獨孝友每值

膳親妻張氏浙飯以進夫婦惟飲米汁比長外商

羸所得值慨然賑布遠近資之嘗焚券千金鄉飲

登筵人稱為積德翁年七十三府志

游如棣沙縣人家貧負販敝衣物食而趨步卓有儒

風事親溫摯母年髦飲食步履維艱如棣甘脆無

缺父柩停家忽大水驟溢如棣扶柩號哭不去已

而水平人以爲孝感府志

黃應賢南平人週歲失怙長而盡心奉母母陳氏侍

舅姑孝及母節上於朝應賢爲建坊晚膺歲薦母

年八十矣遂家居終養妻童氏亦竭力事姑時稱

雙孝縣志

國朝

謝豐郡庠生賦性樂易生平未嘗疾言遽色父宗尹

郡之名宿動遵禮法好施與囊雖慳必委曲承順

稍見不豫卽治具延父友抵舍笑談以快父意父
母喪葬悉從厚已年八十遇忌辰必素衣哭泣悲

戚府志

連文生吉田農民幼失怙未嘗讀書識字家貧力耕
養母母瞽以舌餽之性嗜榛栗嚼以哺之冬溫夏
清不改其常府志

陳光耀邑庠生事繼母孝出必告反必回將有所往
每囑其妻具甘旨遭耿逆之亂急於母而後妻子
日則以肩輿送母匿山夜則輿歸以爲常士論多
之縣志

吳瑤青字丰藻恩貢生天性醇厚竭力養親雍睦以
待諸弟姪祖父遺產悉讓與弟族中力不能葬者
爲謀窀穸當事欲舉優行謙讓未遑其謹恪如此

府志

魏兆泰沙縣人事父及繼母俱得歡心繼母病瘵三
年躬滌褻衣朝夕無懈色父歿哀毀盡禮遭繼母
喪亦如之經營窀穸廬墓以居雖山蔬野菽食必
先祭其親三年如一日縣志

嚴崇高沙縣人父嗜魚貧不能給崇高日垂釣溪潭
以所得供親冬寒魚不上餌臨溪而泣人多貸以

相貽母病量水秤藥數十夜不寐縣册

羅日葵沙縣人父嗜菰笋日葵入山尋採父會飲隔

河隣家日午驟雨父渡舟至中流船頭欹墮水中

日葵冒死入河背父出母病葵虔禱願減齡以增

母壽每夜必四五起縣册

福建續志卷之五十一終

